

四庫全書

集部

欽定四庫全書

集部

范忠宣集卷五

詳校官庶吉士臣龍廷槐

檢討臣何思鈞覆勘

總校官中書臣朱鈐

校對官中書臣潘庭筠

謄錄監生臣李崇實

謄錄監生臣潘衡

欽定四庫全書

范忠宣集卷四

宋 范純仁 撰

律詩

和王定國見寄

危蹤俄復星刑書得喪情懷久已無
憂道不知身竄逐
登山未敵世崎嶇
戀軒無計慚疲馬
向日低飛作晚烏

虞世基詩云
向日晚低飛

薄祿未拋生事拙
涸鱗徒憶縱江湖

和張伯常見寄

芳信初傳喜滿胷開緘氣燄若長虹文牆目視曹劉短
詩將壇登李杜雄一別寒暄迷甲子十年塵土謾西東
知君善誘存先契不欲疎頑墜素風

春日寄許州韓持國

湖上春游阻重陪朱轡紅旆想徘徊鶯花對席應相覓
不見頻攜醉客來

和李康侯屯田見寄韻二首

心為積仁唯豈弟官因任直少升遷處常自享榮期樂

早退皆輸白傅賢官路風波今免矣善人福壽固宜然
謫居未遂歸田計猶欲希風向暮年

仕途三黜信多難名迹常憂不自完幸賴聖恩寬罪戾
敢辭閒地儘盤桓孟生墜甌何能顧貢禹塵冠豈復彈
俸入雖貧家世事釜魚前世已稱丹

雪中池上

碧玉為池白玉堤千林萬木盡花開攜賓欲覓開尊處
祇得清香辨野梅

和管滂著作見寄韻

生平迂拙畏非彝，苦愛曾顏道甚奇。
麋鹿豈堪嬰組紱，漁樵只合在山陂。
遭時不歎馮唐老，忍恥空慚鮑叔知。
盈紙更煩佳句贈，雅情深厚俗難窺。

又和席上見贈

官舍荒涼近古城，園林七月起秋聲。
偶來嘉客從芸省，似對清冰滿玉罍。
談笑從容誠吏隱，逢迎疎野愧朝英。
田廬未得長歸去，山鳥知人半夜鳴。

和任夔節推見寄

暗拙行身足險艱青雲有路敢思攀學承詩禮難窺奧
仕偶唐虞樂抱關掌諫何能裨袞職護邊無術勒燕山
風波忽起人情外瓜李終由自處間白髮報君嗟已晚
清朝謫宦愧多閒夫君年壯才方劭豈合迂遲與我班
和王樂道西湖席上

春湖景物畫圖中朱閣偏宜翠柳籠上客縱談髯奮白
佳人醉舞臉舒紅鋪張錦繡花邊日堆疊琉璃水面風

民俗歡游魚鳥樂主人才合代天工

和王定國見寄

謫居終日省愆尤
貝錦雖成職我由
萍梗屢嗟罹放逐
風波更險信沈浮
生還故里誠多幸
坐廢明時敢不憂
自是無才速官謗
非關有命壓人頭

來詩有數奇信
有將軍命之句

病起和李康侯屯田見寄

養生不達嵇康論
知止聊遵老氏書
左宦行將三歲許
羸病復卧四旬餘
手扶瘦竹形相稱
鬢擬新霜色一如

獨枉故人詩意重，湮磨無改是璠璣。

和郭昌朝寺丞見寄二首

岷峨秀氣入京華，鵬翼搏風勢莫涯。崑玉照人呈美璞，

楚蘭芬畹擢新芽。朝廷遷陟先諸彥，

君於同榜先改京秩

閭里光

榮在一家不鄙義，陽疲病守肯來同。醉岸烏紗

言路再居無少補，護邊三歲乏微勛。非才自合投閑地，
竭節終期報聖君。老去年光流似水，病來世味薄如雲。
讀書記一將忘十，少壯誰教不自勤。

和王微之同持國泛舟登樓

故人還喜笑言同把酒相看似夢中老去卜隣逢晏子
從來解榻賴陳公畫船穩泛平溪綠層觀高橫落日紅
莫訝狂歌先盡醉預愁羈旅向山東

和鄭通議青州范公泉

勝概因人得久存此泉疏鑿自先君發源不負當時意
清影猶涵昔日雲養正迴當深澗下朝宗應與衆流分
今逢賢帥光陳迹名逐新詩海內聞

張挾侍郎讀書堂

三紀仁皇侍從臣當時文學動簪紳
高明已入儒林傳舊室長存歷水濱
峴首空留王粲宅香山猶識白公真
他年遺跡應無廢不墜詩書世有人

和劉孝叔吏部見寄

一自淮陽阻見賢俄驚壯齒變衰年
宦游嗟我身名玷早退輸君福壽延
別後童顏應不改何時醉袂復相連
白頭猶忝山城守常愧君恩未盡宣

和北都王宣徽贈覺海大師

心鏡如如絕斷常人天魔怨詎能傷本來面目超諸相
自在威儀遍十方石火電光隨事過龜毛兔角竟誰長
真風到處堪行化何必江西選佛場

和黃康侯推官二首

得請西臺鬢已班便乘驄馬出齊山舉頭桑梓休懷土
信脚伊嵩勝抱關憔悴精神宜早退太平官職自多閒
三公天下稱人傑名迹何堪比數間

時君實鄭公文潞公皆在洛

少多狂拙老慚非富貴功名得已遲六秩筋骸難任事
十年臺閣謾逢時聖朝貧賤雖堪恥吏隱優閒合作知
回首螭頭嚴近日恍如曾夢到龍墀

以府會阻赴王安之招集次安之韻二首

西都風物最繁華真率相延有幾家遊賞直判連日醉
殘春可忍負鶯花

洛陽春色古稱奇况復名花世所希偶阻嬉遊同一醉

任從闕卉麗朝暉

和文太師真率會

賢者規模衆所遵屏除外飾貴全真盍簪既屢宜從簡
為具雖疎不愧貧免事獻酬修末節都將誠實奉嘉賓
豈唯同志欣相照清約猶能化後人

上文潞公同甲會

潞公程珌中散席汝言司封
司馬旦太中各年七十八

四公眉壽復均年此會前修未省傳筋力輕安同少壯

風標蕭灑似神仙分司東洛榮難並

白樂天詩云今
年四皓盡分司

聚

德西豪事莫肩今夕天官應有奏老人星彩近台躔

送司馬伯康君實歸夏縣

金昆玉季老相親孝弟傳家四海聞
白首還鄉疑廣受清朝得志異機雲
墳簞迭奏聲相應鴻鴈連飛翼不分
一夜西風響黃葉蕭騷助我歎離羣

潞國公生日

一陽將復昂當躔粹儲精降巨賢
啟迪先朝承大統贊襄仁祖格皇天
脩膺百順人誰擬達有三尊我獨全
嵩嶽穹宗河水遠高名遐壽與之肩

安之家庭甘結實三首

溫甘移種自君家香雪年年只吐花結實定非江北枳
新詩先費主人誇

遮藏霜雪免摧殘綠實初垂未滿欄想見主人珍惜意
一回出戶一回看

花果從來盛洛都黃甘結實古來無分金未足均閭里
就賞應須倒百壺

子駿作真率會招安之不至二首

鄉閭貴老寧牽彊德齒俱尊合便安況是耆英會中客
須同八十主人看

齊眉舉案人誰似異膳常珍必自調真率攀邀宜莫應
虬蟬大木固難搖

八月十六日張伯常見訪賞月四首

空庭待月喜佳賓杯杓頻傳酒易醺長笛悠揚侵萬籟
圓蟾激濫出重雲辭榮風節輕三事破的功能伏一軍
高興未闌天宇靜笑談不覺夜將分

老來尤喜見朋游況是才名第一流
今日偶逢甘共醉他年相憶苦三秋
高吟灑落過千首遺愛深濃在幾州
我亦官閒少拘檢留連寧復問更籌

白首相知有幾人良宵難惜醉醺醺
此心直欲清如月外物何妨薄似雲
飲若長鯨吞巨浪詩如老將納降軍
過從幸得閒中樂好惡榮枯莫彊分

今夕無煩秉燭遊露華垂葉若珠流
翰林偏愛尊中月詞客休悲洛下秋
金谷池臺多勝概伊川山水近神州

從茲只合追清景世故何煩妄計籌

和子駿洛中書事

周公作邑遺成康玉帛從茲走萬方四向山河圍殿閣
千家花竹間田桑遊人選勝停車馬詞客尋春雜詠觴
幸得閒官陪几杖欲醺佳句愧荒唐

和君實姚黃玉玲瓏二品牡丹二首

洛城花美四方歸獨有姚黃得見稀曾入黼闈參近侍
分明新染赭黃衣

花得新朋自我公
潔如明玉狀玲瓏
芳心有待人難見
小圃深藏洛水東

元日分壺酒贈楊舜俞大卿

一別年光已浹辰
相逢重憶蜀江春
欲知盈榼分甘意
肯酒思柔屬故人

寄和浮光曹九章大夫

賢守班條俗易從
戴其仁厚服其功
虛心足以求民瘼
實效應須東帝衷
繾綣交情由道合
連緜榜契復官同

當時賜第今無幾共喜優游作老翁

妙覺晚吟呈席上諸公

半生奔走困塵埃晚得優游掌舊臺
庭柏歲寒青獨在林烏朝夕倦重來
閒霑薄祿誠多愧老向清朝信不才
唯喜洛城儔侶盛從容相遇即銜杯

送伯常歸郢中

穰鄧相看少壯時中間薄宦阻親依
幸君西洛休官早值我東齊謝病歸
春色滿城游騎縱月光照席酒觥飛

遙知漢上幽棲樂飽暖全家卧翠微

和韓子華相公同游王君貺園二首

偶陪旌旆縱春游好景偏銷倦客愁紅杏都開如趣賞
夭桃欲坼尚含羞

善政多閒若解牛尋春選勝遍深幽紅芳翠竹圍松島
彊醉清尊蓋自由

和君實雨中即事二首

放盡羣花春欲歸惜春遊樂幸相依不堪風雨成睽阻

卧聽蕭騷灑竹扉

熟寢翻知計慮長
閒齋一枕事都忘
自然便是無何境
夢到華胥亦異鄉

君實邀遊南園雨止

名園選勝許參陪
游騎俄衝急雨回
花裏不聞鶯弄舌
甕頭空愛蟻浮醅
寒雲重結三冬雪
暖律虛飛二紀灰
深恐羣芳便彫落
主人還引上春臺

子華相公應天院行香歸洛川

春色鮮明滿洛川青蕪白鳥望中間千門金碧明初日
四面煙嵐簇遠山橋偃長虹當上苑水涼鳴玉過通關
乘驄幸託車塵後時賴清尊破客顏

和君實南園獨酌三首

晚年光景更闌心尤向芳時惜寸陰每到園林好處
常思貰醉解貂金

寒食三春氣候深落英榆莢滿牆陰未甘密葉成翠幄
不愛黃花如散金

累日懷賢癖寸心誰知獨酌醉花陰公詩字字如珠玉
併得三篇勝萬金

醕韓持國

獨想當年春宴遊湖邊日日醉金甌三年阻作登龍客
不謂相思已白頭

牡丹二首

牡丹奇擅洛都春百卉千花浪糾紛國色鮮明舒嫩臉
仙冠重疊翦紅雲競馳絕品供天賞旋立佳名疎衆聞

園吏遮藏恐凋落直歌青蓋過殘曛

奪盡春光勝盡花都人巧植鬪鮮華摻奇不憚過民舍
醉賞唯愁汚相車密藻攢心承曉露繁紅添色映朝霞
何妨縱步家家到園圃相望幸不賒

上已泛舟疇子華相公

佳節仍逢善政初熙然民物在華胥龍樓影裏回仙棹
隼旆光中從相車明媚山川鋪晚照啾啾絲管響清虛
太平應似義皇世早晚重看洛出書

和文潞公歸洛賞花

公從帝所享鈞天歸及三春景物妍洛鯉烹鮮隨玉饌
姚黃開晚待瓊筵身同五福居周分心似南風助舜絃
花木只堪供暫賞直須嵩少伴長年

文潞公謝事歸洛二首

雲漢成章湛露晞都門宴餞羽觴飛謝安不復東山起
爭似阿衡得謝歸

相國東郊迓帝師紅幢交映碧參差都人共喜安輿到

正是餘花可惜時

和子華陪文潞公宴東田

湍流澹澹走平田清曠園林未暑天
遶圃曲堤都種竹泛舟雙沼不栽蓮
沙邊白鷺翹來靜叢上幽花晚更妍
乘月陪歡忘夜久莎間潛有露珠圓

效宮詞體上文太師十絕

三紀中書更有誰致君堯舜似臯夔
頻年力請方歸第天子臨軒冊太師

太師還政異尋常前殿鋪張冊禮忙入對誰知年八十
身輕拜舞謝吾皇

吾皇重喜見儀形對御排場結綵棚纔見罷時先賜宴
御前親勸一金觥

上前一飲醵金觥侍宴羣公喜且驚呂尚鬻熊今復見
神仙不必在蓬瀛

蓬瀛聞說有仙居甲第園林想亦如遶圃琅玕抽翠竹
平流瑟瑟走清渠

清渠瀉水灌東田十頃方塘不種蓮
白鳥往來明鏡裏
畫船安穩坐青天

天上雖傳周伯星應期為瑞有常經
未如全享康寧福
訪水尋山到處行

行樂心清日日添詩豪酒健獨能兼
從容對客忘威重
自是天真不是謙

謙虛久已得民心三尹西都惠愛深
一自安車朝闕去
萬人側耳聽歸音

歸日天恩賜畫船
傾城士女盡迎觀
園家連夜擎筠籠
為趲明朝獻牡丹

和子華游韓王園懷故園池蓮紅薇二首

丞相園池冠壁田
娉婷次第坼紅蓮
主人居守麟符重
誰見新粧照水妍

鮮葩嫩蘂吐香濃
千朵妖饒顫晚風
却想許園仙品盛
姝衣輕透玉肌紅

再赴蒲津陪解梁張守安邑王宰游靜林

千騎翩翩逐郡侯，條山重繼昔年遊。
翠深疊嶂煙嵐晚，綠滿長郊稼穡秋。
勝概不知行客老，征驂聊為主人留。
預思別後登臨處，應見黃河入海流。

贈張大夫

白首衰顏愧復來，當時懷抱向誰開。
登臨髣髴驚前夢，遊賞從容憶舊臺。
旨酒欲斟懷老伴，高吟難敵想天才。
會須早逐君歸去，茅屋荒田半草萊。

寄上文潞公

孫閣重登愧玳簪情同倦翼託高林
蒿邱未敵仁基厚
河洛寧如福海深
善教每聞當鏤骨
重知難報欲霑襟
至誠懷德逾飢渴
不比尋常勢利心

寄上西京留守子華相公

疎頑曾是費鑪錘
從昔叨蒙國士知
一阻門牆驚歲月
幾回魂夢到蒿伊
神仙客佩黃金印
燕趙人斟白玉卮
薄宦浪拋東閣去
君恩未報歎衰遲

寄鮮于子駿西臺

僚友難逢不世賢
洛臺經歲共清閒
蒹葭豈合依良玉
培塿何能望泰山
直道難堪從俗尚
清新原足重人間
期君致主登廊廟
茅屋荒田我自還

和薛中散踏青詞

遶郭依依柳漸青
綺羅深處畫船橫
坐中唯欠賢鄉老
把酒向風無限情

寄和子華相公王園賞梅

玉豔霜葩萬朵攢
曾陪宴席醉中看
西州縱有尋花處

亦待頑童格舞干

題河中府名閫堂

誰擘中條太華開萬家填郭聳樓臺嶽呈仙掌日邊見
河瀉龍門天上來煙靄遠分秦甸闊山川都抱舜城回
堅碑應是當年石重見吾皇詠起哉

寄題張運使先隴永慕亭

武夷山色倚天青中有賢儒謝世榮自以高名傳積慶
不教黃壤掩清名構亭傍隴同虛寢陟岵無時見孝誠

寧獨顯親由富貴還能厚德庇羣生

入河中庸

道傍禾黍穗交垂旌旆紛紛曳綵霓
山夾兩河嗟地險雲埋萬堞覺城低
十年不到身如夢五馬重來路欲迷
却據歸鞍下長坂轅門迎謁引行齊

謝張解州作名閭堂記

氣如巨浪瀉長江清似寒冰滿玉缸
幾與賈生摩壁壘未令張子見麾幢
色絲幼婦宜傳久肉袒牽羊合亟降

欲近雲章刊翠石却憂染翰孰能雙

秋日席上

邊霜肅肅滿川梁無限秋懷付一觴
白酒聊同佳客醉黃花不減故園香
民兵已許歸南畝聖澤行聞赦叛羌
得脫征衣歸里社大能醕酌樂時康

遊寡阜廟二首

古祠東北據孤峯臺殿穹窿出半空
塵市縱橫碁局布雲煙重疊畫圖中
登高覽勝慚吾祖放意尋山憶謝公

却愛夕陽照歸騎翩翩旗旆滿川紅

逾旬積雨喜新晴民物熙然百穀成風葉蕭騷林野薄
霜天寥廓日華清千山甫隔烏延塞兩水傍臨不窟城
但得年豐人足食犬羊餘種豈須平

和韓持國見贈兼簡王微之

身由疲病難從政性本顓愚不學禪到老豈能成一事
飢餐渴飲謾隨緣

和持國

時奉清歡消鄙吝真同寒水滌塵沙尊傾玉粒醅浮蟻
叢合金英菊有花湖面烟霞如澤國波心亭館似仙家
四時風月皆堪賞不獨霜前愛物華

偶成

橫笛佳人用意深數聲高起渙湖陰梅花落盡還堪惜
留取殘英伴醉吟

西湖四時四首

白鷺文鴛鑑裏飛紅橋朱閣影參差疎林密雪皆堪賞

不特尋芳避暑時

萬頃琉璃蹙翠鱗
日遲風暖物華新
千花百草遊人路
應謂壺中別有春

深堂高閣啟清風
舟泛荷香柳影中
日月待公逃暑飲

官無拘檢是琳宮

持國微之皆
領崇福宮

夕陽照水晚登樓
皎月涵波夜泛舟
珍重前賢開展意

中年長願守閒州

宋相詩願賜
閒州不計年

和微之以足疾不赴西湖賞雪

年來遇景彊追攀長恐身衰興易闌八十康寧天下少
四并聚會古為難客塵隨念須頻拂世網縈人且自寬
布政未能躋樂俗愛賢猶喜共清歡湖光映雪凝深碧
野色當軒展素紈心似白公何慮脚白公詩云既有
心情何用脚燕

堂深暖小安禪

丹音

范忠宣集卷四

欽定四庫全書

范忠宣集卷五

宋 范純仁 撰

律詩

和持國贈微之

元老邀賓樂事并，每居右席愧羣英。里中耆舊唯公長，

微之年
最長

醉裏篇章映古清。柔袂緩舒鸞鶴舞，短簫輕引

鳳凰鳴。莫嫌尊酒過從數，向老交遊更有情。

贈持國持國以瑞鷗鵠歌之

三十年來解榻賓今朝重喜奉陳蕃松筠雅操寒逾勁
膠漆深情老益敦槐位已慚同致主棠陰還許繼為藩
古今此會應難得醉飲休辭罄綠尊

和持國瑞鷗鵠

詞

臘後春前暖律催日和風軟欲開梅公方結客尋佳景
我亦忘形趁酒杯添歌管續尊壘更闌燭短未能回
清歡莫待相期約乘興來時便可來

謝微之見贈

屬邑逢公喜望塵便陪將漕向江濱當時早重朋僚契
晚歲重敦道義親華袞已慚無德稱琳宮彌羨最閒身
相過無惜頻歡醉八十康寧有幾人

和持國光祿堂賞梅兼寄彝叟德孺

叨榮報國老無成辭疾還鄉負物情身近良朋如倚玉
心懷諸弟若搖旌成行每羨隨陽鴈得友何慚出谷鶯
光祿官閒容謁告掃除門巷待同行

奉寄西京玉汝相公

三紀榮途愧彙征數逢憂患見交情

每遷謫困病
煩公憂恤

江吳

切喜陪經席

同聽李太白講禮

關陝還容並使旌大尹綵旗方

畫隼上陽喬木欲遷鶯銅駝金谷春遊盛誰伴朱輪五馬行

和持國聽琵琶二首

美人成列抹朱絃勸得嘉賓醉滿筵却笑西湖遊賞處
村歌社舞謾盈船

須知絕藝好娛賓能使知音作伯倫累月應將答樂籍

退之詩云累月答其兒
恐公重作獨醒人

和持國謝見招游湖二首

樂天向老占青蛾
裴令高年欲聽歌
擬假紅粧助歡醉
莫嫌賓主白髯多

白傅歸來西洛宅

謂微之

裴公居在永豐坊
持國好歌愧乏

牛家妓不見淳于醉後狂

白公與牛相詩云君家有美酒君家有

留住住即恐君無奈何

和李微之正議

致主唯將盛德臨世推文定總朝簪先門自昔蒙知早
開閣當時用意深功業所存皆國計忠賢有後見天心
冢卿耆德承家慶福壽康寧映古今

過洛謁文潞公遊東田

東田不到幾經年孫閣重登荷眷憐清世莫尊唯尚父
朱顏難老是真仙四朝弼亮繫賢業八表昇平賴化權
門館舊生彌幸會再陪几杖向林泉

送滕達道龍圖交代歸闕

三紀分攜念友生天涯相見眼重明
詔恩幸忝交承契尊酒聊伸故舊情
我守塞垣華髮短君歸鄉國錦衣榮
何時共老江湖去雞黍相過樂太平

秋晴思西湖寄韓少師

樓閣參差霜葉紅湖光秋色畫圖中
移船影動波心月橫笛聲隨水面風
當日席間先醉客如今塞上獨衰翁
思君情緒兼歸興暗逐汾川日夜東

寄西京留守韓玉汝

四朝出處久親依共上青雲更復誰里室相隣同晏卜
廟堂曾忝奉蕭規恩榮過分知難報憂患頗經覺早衰
一意待公還宰席放歸箕穎養癯疲

九日遊西山開化歸會柳溪示程憲

登高觀稼適同時賓從喧闐逐隼旗殿閣崔巍初日照
林巒蕭索曉風吹山空笳鼓穿雲響徑險車徒出谷遲
坐阻車公歸興速却尋黃菊醉西池

酹王定國

守麾猶得長諸侯全晉提封二十州
畫角悠揚高戍晚黃榆搖落故關秋
防邊戰士多鄉思並塞胡兒學漢謳
早晚罷兵容請老邀君同醉潁湖頭

壽程定塞提刑

衰疲敢憚守邊州老去光陰似水流
塞馬春深無苜蓿田家雪足望麰薅
清笳只解添鄉思白酒聊堪解客愁
獨喜平刑賢使者能將德慶紹箕裘

讀老杜憶弟詩寄二弟

昔賢遇亂多分散我汝逢時各宦遊乃信人生歡聚少
安危俱不免離憂

寄二弟

宦名驅役費光陰寒暑憂勞晝夜侵多病形骸衰易感
無涯思慮老難禁離羣終日嗟予季聚首何時獲我心
精力已疲恩未報懷歸體國念俱深

迎文潞公再謝重事歸洛

河陽洛下春遊盛兩處風光屬一家不獨都人瞻几杖

笑迎唯有滿城花

洛人獨以牡丹為花

送潞公遊河陽河清

安車乘興賞春妍
榮盛歡康世莫肩
舊舍訟棠重蔽節

河陽公舊治而令子再領

昔遊畫錦復蟬聯

河清公侍行之地令子令孫又守此官公每再

遊

子孫擁節迎家府
稚艾爭途看壽仙
堪歎三川疲病

守陪公不及望公還

洛花已開報潞公

花開朝夕望車塵
花意慙慙恰似人
晴日暖風催更急

看看開遍洛陽春

贈蘄簞與潞公二首

雙文封卷如筒小六月鋪張滿榻寒曾是吐茵狂醉客
敢塵齋閣助清歡

涼簞資公逃暑用東池應伴淥波寒高眠宜享華胥樂
曾致皇家奠枕安

病中寄太原韓玉汝

弱柳何由羨老松衰姿勁節本難同河南羸卧漳濱叟

塞北鷹揚渭上翁多病未能謀早退壯猷方看策元功
幸公再致唐虞化庶託餘生壽域中

次韻持國謝送酒

重九思公向洛陽三秋此日念何長心隨白酒聊相寄
頭插黃花想共嘗盈幅忽慚瓊玖報開尊應伴綺羅香
明年花好能來否元老同期醉壽觴

潞公已約馮當世
來春看花彌思持

國之
來

龍門秋日上潞公二首

龍門秋色勝春時
新霽登臨景更奇
二室峯巒侵碧漢
兩涯樓殿照清伊
鳴泉亂瀉香山道
翠柏深藏白傅祠
獨恨不能陪杖屨
思公空作寄公詩

郊原經雨絕纖塵
短麥蒙茸蓋壠新
霜葉粧林成錦段
溪風吹水作龍鱗
秋山蒼翠濃如畫
晴日鮮明暖似春
遍叩禪關止三宿
猶慚高退自由身

三弟得告來見省

一門遭遇世應稀
詔許尋兄荷主慈
屈指共驚遊宦久

差肩却想事親時
慚卿才識加昏耗
嗟季情懷畏別離
報國爾曹心尚壯
無能唯我復先衰

慚卿用東漢陳寔公慚卿事

喜弟妹相聚

宦遊離索每相望
弟妹俱來喜莫量
言笑從容忘世味
盤筵簡率任家常
清朝幸免鵠原急
白首欣逢鴈序長
安得身閒歸里社
一尊共醉樂時康

題潞公翰墨卷後

四朝勲業載旂常
九十精神正壽康
燕翼自當傳百世

豈徒書法付諸郎

昔帥環慶為部將所訟馮君學士被制鞠獄而
獲平反今相遇於洛

忠臣守正不謀身處已雖危道益尊直為冕旒宣聖訓

君受命而被德
音必見史冊

豈唯囹圄被寬恩陰功自可資耆壽餘

慶猶當見子孫徒有愛賢無所達行將歸老愧難論

疇持國攜具見訪之作

兩家邦義世難倫老去相逢意愈親衰暗豈能宣上化

高閑空惜致堯人論交白社逾三紀接武黃扉近十春
終日追陪何所樂從容言笑盡天真

和劉公舒相訪二首

嘉賓嘉景喜相陪況有良朋冒雪來湖漲碧波三十頃
枝粧玉蔭萬千梅白頭道舊情難盡淥酒相期醉幾回
衰暮若非君顧我平生懷抱向誰開

上庠英妙已相陪

同在太學

隨計觀光亦並來給扎偶容親

硯席

殿試同案席

掄才同是中條枚他年濶別常千里此地

過從只兩回衰病從來游宴少為君尊酒喜頻開

到漢東和張伯常六首

道義相期久益芳忘年敦契自南陽榮公三樂今誰似
李白千篇敏異常願見却須煩枉駕奉歡先已闢東堂
故情新約知無改松柏從來耐雪霜

寵榮踰分自顛躋珍重高人早拂衣山郡經時無好客
鈴齋終日敞閒扉瓊瑤獲報欣情重酒醴將誠愧物微
道義充盈文筆健應容殘朽再親依

思君日日上高樓心逐西南漢水流側聽車音常有待
互醺詩興未能休高陽簪履成陳迹西洛衣冠散舊遊
獨有地僊年八十逍遙林下笑公侯

浮名驅逐阻音塵一別伊川十二春顧我衰殘如槁木
羨公耆壽若靈椿寒梅乍吐香尤馥白酒新篘味頗醇
對景便思同一醉都忘衰病在漳濱

高標早與利名疎獨向先門肯曳裾舉眼正無羈客伴
解顏頻喜故人書相期消息應端的久別情懷待展舒

聞說山城春色早安車乘興莫徐徐

詩筒相續到隨城練句揮毫老益精尺素屢兼雙鯉贈

公累寄嘉魚

一言相諾百金輕酒思佳客忘懷飲梅吐新香

撲鼻清但得安車尋舊約敢施行馬待先生

神宗皇帝挽詩四首

舜孝高千古堯仁化萬方睿文超聖域神武振皇綱典冊辭徽號山河復舊疆玉輿悲晚駕陵路柏蒼蒼

應運千齡并持盈七閏間當年叨法從終日奉威顏鳳

輦知何往龍髯杳莫攀深恩無路報慟哭向橋山

紫塞持戎節青蒲職諫垣囊封矜朴直牘背辨深冤終
賴重瞳顧難忘再造恩微軀如獲殉黃鳥不須論

祖祭連馳道宸儀出殯宮旌幡縈曉露笳鼓咽悲風雨
泣千官送雲奔萬國同丹心隨籠水先到裕陵東

慈聖光獻皇后挽詞二首

帝圖綿永合無涯天降真人動魯沙兩奉離明來繼業
久膺舜養似重華徽音遠過周文母儉德深懲漢外家

仙仗忽遙靈寢閉悲風空引戟幡斜

畫梁歸燕拂輕埃慶壽宮花亦盛開平日仙蹤何處覓
今年春色為誰來銀門永隔慈孫問陵路俄瞻吉仗回
聖主孝思刑四海千秋萬載詠烝哉

富相公挽詞五首

河嶽神靈降唐虞景運開致君優聖域躋俗在春臺天
上台星坼人間梁木摧霜風咽笳鼓斷續送餘哀

二紀經綸業三朝翊戴勲忘身裨庶政憂國見遺文東

閣散羣彥北邙歸大墳邦人仰旟旒灑淚向寒雲

千齡遭際盛五福始終全還政周星紀懷忠入夜泉華
夸思舊德河洛遶新阡空有云亡歎何由止逝川

皇天不憖遺聖製極哀榮遼海千年去明堂一柱傾赤
松違素志白日閉佳城康濟無窮事皆為後世程

北走單車馴駢猷東徂萬室活飢羸謀深先帝承祧日
功在仁皇與子時英氣不隨鐘漏盡高名長與日星垂
登龍孤客懷知遇慟哭秋原欲訴誰

安州張大卿挽詞三首

廉良漢循吏清簡晉名臣五福歸休日三朝盡瘁身潛
心窮聖典遺德化鄉人燕翼看賢嗣才名服搢紳

瞻風從漢上託庇在襄城開豁心相照推揚義不輕俄
嗟黃壤隔莫展素車情空望涓涓溪月淋浪涕泗橫

寒風咽笳鼓曉月帶旌旛觸目傷陳迹書紳記緒言應
山巖石榔夢澤對松門逝水何由止清名後世存

張益孺學士挽詞二首

儒業高羣彥詞場第一流能聲喧幕府穩步到瀛洲畫
繡臨鄉郡紆朱葬舊邱他年文苑傳應有盛名留
官曹曾共職友益賴多聞信道甘違俗同心獨有君漳
濱俄感疾泉下忽脩文致主平生志蕭條掩一墳

謝師厚挽詞三首

妙年辭筆已驚人不謂明時阻致君白首郎中歸白水

青衿弟子到青雲

翰林賈直孺公之門弟子

淵明雅有歸田興賈傅

空留弔屈文千載定應無孔孟一言誰為謀孤墳

天地鍾奇秀公應為世生何慳一老遺遽奪萬人英千
古長齋恨重泉不掩名繆當幽窅誌深愧色絲銘
侍行游鄧學纔喜識荊州一顧蒙青眼相知到白頭坤
維同謫後星紀等閒周不意終天別交頤涕不收

王安之朝議挽詞三首

行已無瑕玷終身樂太平人間五福備宦亞九卿榮冠
蓋傳風範鄉闕憶老成幽窅窮厚地不掩是清名
族望高全蜀交游華衆賢退身將一紀遺德滿三川雅

道何人繼家聲有子傳為文慚幼婦謬諾誌新阡
多難求分務相依得古人道心閒裏契友分老來親不
謂終天別纔離一月新無由瞻几杖灑淚向秋旻

程明道挽詞三首

綵衣方養志諫省遽翹英短命嗟顏子長星喪孔明臨
津失舟楫支廈闕梁楹名節同伊水滔滔萬古清
天乎喪吾道命矣歎斯人後學隳梁木明時奪國珍孔
懷存愛弟皓首奈慈親唯有延陵誌斯文久愈新

素忝金蘭契情由道義親聖時方際遇英氣忽沈淪琴
在無鍾子斤存失郢人遙聞歸葬日清淚滿衣巾

司馬溫公挽詞三首

精誠皎白日利澤漲滄溟志苦生靈樂身勞社稷寧人
間失軒鑑天上圻台星唯有真儒效長留簡冊青

竟因勞瘁沒誰翊太平基哀訃驚朝聽嚴禋罷慶儀梁
摧大廈日舟失濟川時千古商巖畔應陪傳說祠

傅巖在公

鄉邑

兩宮思舊德異禮賁忠魂翠輦親臨後蟬冠錫命尊霜
風咽笳鼓寒日慘旌旛不獨知心客徘徊哭寢門

母清臣中散挽詞三首

先府西征日高賢進謁時驂騑神骨異丹鳳羽毛奇外
計留關決中朝失表儀濟時才不展已有令名垂

奉使頻聯職寬條喜共頒蒹葭倚白玉培塿對高山勇
退輸先識榮歸得早閒塞垣聞訃日感舊涕潺湲

鄉里尊者德朝廷重老成銅符辭寵命琳館遂高情天

下三尊盛人間五福榮豈唯身獨享有子紹家聲

盧通議挽詞三首

耆舊今多少唯公景德人家隣吳市卒名重漢廷臣路
在猶耕月門閒似送春空堂餘畫像髮髯舊精神

教子生前貴休官物外榮去家金節重開戶玉棺輕江
水元如舊松林長未成祇應山鳥恨長向壠頭鳴

誰記先生事聲名五十年素風人不及陰德世相傳氣
與詩流合官隨子舍遷門間迷故客悵望白雲天

孫曼叔尚書挽詞三首

少海風雲會先朝，眷遇隆直辭裨袞闕妙翰照琳宮。
未展陶鈞手，徒高羽翼功。卹終皆盛典，傷盡出宸衷。
彼俗爭同好，唯公恥妄隨。青松寒不改，白玉涅難淄。
梁壞營居日，舟沈欲濟時。空留良史筆，長俾善人思。
交分逾三絕，官聯歷四朝。心知俱白首，接武近青霄。
逝水嗟何及，英魂恨莫招。空悲柏城路，風雨暮蕭蕭。

龍圖張公挽詞三首

儀鳳來丹穴麒麟瑞聖時壺冰凝雅操冠玉聳英姿敦
闋今儒將循良古吏師未登台鼎貴胡不到期頤

四紀澄清志三朝盡瘁身褰帷躋雅俗緩帶息邊塵聖
世殲民望中原喪國珍千秋仗良史直筆記賢臣

兄事兒童日情親五十年西州官共久

予兩為陝漕兩帥慶公亦兩為

陝漕兩帥熙泰

畿邑政相連

公繼予宰襄邑才隔一政

謫籍孤蹤遠亨衢衆

望先那知不復見一別遂終天

鮮于諫議挽詞三首

左蜀稱多彥唯公第一流青蒲曾悟主白首未封侯名
節傳千古英靈掩一邱平生僚友分懷想涕難收
命矣纔中壽天乎喪哲人逢時身已病達晚志難伸清
儉貧彌樂文章老更醇貽謀有餘慶孫子自振振
曾向西都陪白社同為御史帶烏紗盤筵真率無多品
歌舞相參作一家連日賞窮伊闕寺乘春看盡洛陽花
那知遙作終天別不預鄉人挽葬車

申國太師呂公晦叔挽詞三首

冢宰傳三世元勲輔六朝承家同鄭武致主必唐堯梁
壞將何仰川流不可邀新阡人散後林柏暮蕭蕭

儀物羅西甸恩榮葬上公悠揚蒿里日慘淡柏城風河
嶽收英氣旂常紀茂功傳家多令子將復繼遺忠

達尊推國老雅量寔予師世翊千齡運哀聞二聖悲傷
心瞻傳象竭力奉蕭規多少忠賢淚非唯哭已知

蜀郡范公景仁挽詞三首

翰苑文章伯金華侍從臣四朝行直道一意在生民白

首唯憂國青雲早退身囊中有遺藁不學茂陵人

伊洛相逢日忠賢盛集時游從敦氣義唱和若墳荒漢

嗣資商老

公在朝首上建儲之議

堯章憶后夔

公嘗進新樂

云亡時共

惜不獨故人悲

新阡近箕潁故國遠岷峨禁從同儕少門風吉士多笑
言如昨夢身世逐顏波唯有高名在千年不可磨

李師中待制挽詞二首

才識無前輩文章有古風愛時甘屢黜報國仗孤忠夙

有請纓志竟成標柱功子孫傳善慶不獨在其躬
歷陽相遇日流落喜俱存不起騷人歎唯知聖主恩蟹
膏紅滿筯蟻酒白盈尊豈謂江邊別深情不再論

康國韓公子華挽詞二首

棣萼聯三事台星聚一門誠心多士服德望四朝尊傳
相騎箕遠蕭規與漢存兩宮臨奠日哀慟見殊恩

弟兄俱是龍門客數載難忘國士知疲馬每憐諳遠道
焦桐竟待掛朱絲青雲空費提携力白首應無報稱期

未到柏城持葬紼祖庭長慟涕淋漓

李彥深哀詞二首

妙年親研席壯歲各西東
場屋騰文價鄉闕振義風
不違顏巷陋竟哭阮途窮
賴得賢夫子遺駭為送終

汲汲親師友翹翹絕輩流
讀書求體要知命釋窮愁
清白傳三世才華掩一邱
平生懷舊淚為子獨難收

王樂道觀文挽詞三首

人間失詞伯天上落文星
商皓終辭漢桓榮厭授經
重

泉齋志業喬嶽返英靈身後千年事空留竹簡青

秘殿承新寵儲宮冠舊僚從龍登紫極扶日上青霄
暝壑移舟遠長川閱水遙瞻懷柏城路丹旄去飄飄

纔罷荆州市俄歸蒿里墳鹽梅失羣望羽翼有前勲
浪作登龍客慚無幼婦文辱知無以報灑淚向嵩雲

張拔龍圖挽詞三首

宣力三朝舊於身五福全家風良將後經術古人前
丁令終辭世留侯定得僊貽謀有賢嗣素業盡能傳


江邊承訃日羈宦正催顏早獲登龍便慙無附驥才寄
詩招悸魄引水活枯腮白首知難報長言致一哀

二紀金華侍從臣昇平看足作閒人身躋顯仕由稽古
世有陰功為庇民但見朝廷方貴老那知河嶽遽收神
哀榮終始公無憾况有清名服搢紳

望日示康廣宏

此詩舊在第十卷司馬公詩序
後康廣宏即司馬公三子名

清晨三綠袍羅拜北堂高積善因先烈遺光及爾曹勿
矜從事早當念起家勞脩立皆由已何人可佩刀



范忠宣集卷五

欽定四庫全書

集部

范忠宣集卷六

詳校官庶吉士 龍廷槐

檢討 臣何思鈞覆勘

總校官中書 臣朱 鈐

校對官中書 臣潘庭筠

謄錄監生 臣潘 衡

欽定四庫全書

范忠宣集卷六

宋

范純仁 撰

表

安州通判到任表

臣某言伏奉勅命依前朝奉郎守侍御史通判安州軍
州事已於今月某日到任訖者進思盡忠乃臣子之常
節退人以禮蓋君父之至慈俯仰戴天凌兢跼地 中謝
竊以昔在治隆之世多求諫爭之臣謂聰明不足以自

勞故耳目必資於衆助仁皇嘗行此道以致太平先臣
適會茲時屢陳讜論洪惟繼統之始深慮守成之難方
求正人俾在言路而臣學非遵古才不適時非由左右
之薦揚獨以家世而掄選處之憲府加以法冠敢顧已
以偷榮遂竭忠而論事朝廷方行於大典理必正名廟
堂欲遂於初謀惡其異已言皆不用分固難安投劾告
歸閉門待罪本忘身而徇義庶盡節以報君鼎鑊加誅
乃其始望雷霆收怒敢意復生尚作貳車之行仍居綏

服之近人皆閔其遷謫臣實謂之恩榮此蓋伏遇皇帝
陛下睿知察微寬仁容物謂誠心可諒止於愚直以無
他雖怨敵在前不使毀傷而過甚保全至此感幸何涯
臣敢不益勵孤忠勉堅素節死而後已希先哲之遠圖
知無不為醺聖君之大德臣無任

信陽軍謝上表

喧訟亟興駭人情而莫測誣辭終辨蓋天聽之難欺恩
從推究之明感極矜容之大中謝竊念臣性資愚淺學

術迂踈仕緣家世而聞進乏左右之助先帝慎臺閣之
選嘗被甄收陛下求諫爭之臣首叨東掖自謂大恩之
難報誓竭忠勤詎知適道而寡權動貽悔吝暨屢蒙於
器使卒無取於寸長僅同鼯鼠之五窮徒過古人之三
黜向由罪戾之迹驟當帥領之名詔命初頒已致有司
之駁議懇辭弗獲遽承中旨之促行果貽負乘之羞自
速簡書之謗內辜朝寄外辱將權省愆甘竄於遐荒屈
法至煩於全度此蓋伏遇皇帝陛下堯雲溥覆湯網廓

開記憐舊物之微闕畧小臣之過止鐫閣籍尚畀軍麾
矧松楸之匪遙復土風之不惡田寬穀賤民樸訟稀蚩
蚩本樂於太平斷斷或成於靜治庶收來效少塞愆尤
臣無任

謝換朝散大夫直集賢院表

臣某言閏九月二十五日進奏院遞到敕誥各一道特
授臣朝散大夫直集賢院仍加上護軍差遣賜如故者
承流居外荷謫命之寬優渙汗從中拜恩榮之併至省

躬無地蒙施若天

中謝

伏念臣學不知方戇唯拙守濫

霑祿仕自託公朝先帝采其家聲擢居言路陛下博於
器使驟玷清班每投劾以下遷輒掩瑕而收用向冒邊
防之寄猥分節制之嚴奉陛下之訓辭識先臣之遺教
謂宜綏靜而復紛紜既速煩言且無善狀至于吏議甘
擯棄於明時獨賴君恩獲安全於散地豈期簡記靡俟
終更因宗祀之慶成易官名而還職朝家新制遽叨等
級之榮書館舊遊再竊光華之選仍加勲號盡出洪私

式示優遷非徒起廢此蓋伏遇皇帝陛下體天洪覆秉
道建中恢全德以博臨憲先猷而致治謂臣閥閱之後
雖屢試以無成憫臣齒髮將衰俾自新而圖效致茲寵
獎下及孤孱臣敢不仰體深仁俯追往咎居官弗懈庶
無門戶之羞論報何階猶有簿書之責臣無任

同天節進功德疏表

伏以純乾盛旦甲觀聖期爰脩梵席之儀願效華封之
祝臣職縻符守望遠槐宸稱觴執玉之庭莫陪盛禮脩

供布金之地但集勝因泰元增授策之休上帝永與齡之福臣無任謹具功德疏隨表上進以聞

又

伏以朱明戒候真聖挺生前彌月之盛期效祈年之善祝臣州符是守宸扆方遙仰望堯雲莫預大庭之列遠陪嵩嶽徒稱萬歲之聲

慰皇帝表

臣某言伏奉中書門下牒降到十月二十日太皇太后

遺誥臣即時與本軍官吏舉臨掛服訖禍鍾長信哀激
中宸下逮蒼黔同深悲愴伏以太皇太后功超十亂德
厚三朝輔仁宗與子之明啟先帝繼天之業徽猷冠古
陰賜在民方期萬壽之遐奄棄二宮之養恭惟皇帝陛
下誠深舜慕孝篤天心痛問寢之長違悵陞僊之莫返
然而逝川難遏大化必遷伏望俯抑聖情勉從禮節寬
慈闡之至念副宗祏之永依臣以官守所拘不獲奔詣
闕庭

進南郊絹表

伏以大祀歲儀方盛禋天之報羣方效職宜脩任土之誠前件絹歲賦所輸邦經攸羨媿乏筐織之美幸供庭實之繁干冒宸嚴臣無任

河中府謝上表

伏奉誥命差權知河中軍府事已於今月十二日到任訖養痾竊祿早蒙從欲之仁起廢叨榮再玷惟良之選大恩曲被感涕交零

中謝

伏念臣生偶昌期幼承先訓

才疏學淺志廣識微荷先帝之誤知擢居言路遇大明
之繼照首玷清班嘗簪筆於螭頭復建牙於玉塞曾乏
涓埃之報旋貽負乘之羞竒薄易艱疎拙多罪每蒙容
覆未即竄誅頃以積釁招殃私息多故由賦情之滯塞
至得疾於悲傷疲駑雖切於戀軒荒忽詎任於陳力冒
至慈而瀝懇獲閒局以偷安甫閱再朞忽更優寄矧河
中古郡陝右輿區表裏山河地交馳於使傳足給兵食
民薦困於賦輸宜得名臣倚為良翰豈容孱劣可副東

求此蓋伏遇皇帝陛下廣度包荒至明燭遠如堯仁而
天覆邁湯聖之日躋憐舊物而弗遺無一夫之不獲有
如羈賤尚在采收敢不策勵昏愚罄竭忠義頌宣聖澤
撫養疲屯誓於捐糜以為報稱

慶州謝上表

伏奉詔命特授臣直龍圖閣權發遣慶州軍州事兼發
遣環慶路經畧安撫使兼馬步軍都總管公事已於今
月初三日到任訖內閣圖書復登於顯地藩方印紱還

守於故封恩榮曲被於訓辭瞬息但驚於歲月彷徨自

失踟躕難安

中謝

伏念臣樸樾散才迂疎淺識因緣世

閥遭遇聖時鼯鼠多窮徒施於五技鷦鷯自足常守於
一枝入踐諫垣出持使節雖數更於眷任常抵冒於譴
訶求散地以置身荷公朝之從欲自安遲暮絕望進升
假守河壩方愧麾符之寵統兵塞上俄兼連帥之權此
蓋伏遇皇帝陛下天授睿文日躋峻德善貸不遺於舊
物噓枯特借於殊恩衰拙無堪齒髮僅同於蒲柳忠勤

自效涓埃覬展於桑榆

又上詞同前

太皇太后殿下保佑皇家統持大業政自脩於帷幄德
已被於海隅噓枯無間於寒茲求舊不忘於遺履故茲
衰晚亦預東求臣敢不宣布上仁懷柔遠俗奮揚弱嗣
乘時猶待於一鳴策勵駑蹏竭力尚期於再駕

辭免天章閣待制表

今月九日都進奏院遞到誥命授臣朝議大夫充天章

閣待制差遣勲賜如故者斗筭之器常懼滿盈天地大

恩豈宜忝冒

中謝

伏念臣秉心拙懦涉世迂疏託先臣

之緒餘叨聖朝之祿仕偶超末路獲玷清途當英皇御
極之初擢居言職會先帝承祧之日復在諫垣一無建
明再取罪戾起廢旋霑於雨露包荒實賴於乾坤預八
使以觀風假一麾而出守俄升內閣俾治西州雖夙夜
以在公終負乘而致寇尚蒙善貸得追嚴誅去國累年
屢轉萍蓬之迹愛君一志常傾葵藿之心遼水猶冀於

鶴歸荆山遽悲於龍去皇明嗣統聖治惟新適當兵賦之餘尤重邊防之寄特還故職再領舊封任總連城時方累月遽膺寵數遂越衆人况素乏於事功恐難堪於侍從雖大君之命義不當辭然匹夫之誠志有難奪伏惟皇帝陛下聖文天縱睿智日躋邁虞舜之聰明繼商宗之恭默正人彙進率土阜安豈茲孱微敢當東拔非矯情而固避懼過分之難勝仰祈宸嚴追寢成命力小任重實畏於官箴天高聽卑願從於人欲

又

太皇太后殿下坤儀厚載天德高明化已冒於海隅政
允脩於帷幄正人居位多士向風豈茲孱微敢當東拔
非矯情而固避懼過分之難勝仰祈宸嚴追寢成命下同

賀立皇太子表

離明有繼震器攸歸正朔所加歡愉遐暨

中賀

臣聞遂

古以降謳歌或尚於歸賢逮夏而來歷數丕承而與子
恭惟皇帝陛下憲天立極體道宅師以謂下武繼文有

以終光華之運唐堯授舜使之繼魏蕩之勲爰因冢嗣
之良肇峻青宮之筵問安視膳日滋孝友之聲監國撫
軍允係天人之望璇源疏衍烏奕靈長臣限守方州久
叨睿睎阻趨丹陛徒溢深衷

謝給事中表

去國彌年方再臨於西壘還朝不日遂升隸於東臺仍
參帝幙之游以待聖謨之及衆知其寵臣則甚慚中謝
伏念臣生匪異材長唯拙守在官論事既無經遠之謀

為政治民又乏可書之績徒以朝廷之樂善或緣家世以用人已廢復興雖窮若達逮四方之承化與萬物以歸心忽於鼓舞之中薦被甄收之渥黃扉嚴近遽使叨居黼座燕閒獲從勸講器能甚薄職守過優豈聖世之乏人迺宸衷之念舊懇辭弗獲虛受為慚此蓋伏遇太皇太后殿下淵懿內充聰明旁燭酌民言而布政公天下以為心致使衰遲亦蒙東拔敢不深思官守屏去身謀務通中外之情勉究聖賢之蘊腐儒已老雖非適用

之材善政日新姑盡可陳之力

又

瑣闥要官經帷異選自唯衰晚猥玷詳延既辭命以靡

從遂冒恩而居次

中謝

伏念臣受材迂拙臨事闊疎祇

由門戶之相傳得與衣冠而並進謬更煩使寢步清塗

志敢望於有成言以狂而無補謗雖不免寵亦繼來知

無後效之可圖每愧先朝之再造及陛下重明委照麗

澤旁流方悉力以乘邊敢萌心於處內既升要近復賜

召還新政方行已喜朝聞之道舊游如夢更分夕拜之
榮俾入講於金華將親承於玉色其為幸會遠絕尋常
此蓋伏遇皇帝陛下聖道生知孝思善繼緒正朝廷之
大體述成祖考之遺謀布政之初以人為急如臣不肖
被睞尤深父子遭逢雖在一門之內君臣際會凡叨四
聖之知施及衰年併蒙殊獎內惟白首殆種種以無堪
顧有赤心尚惓惓而自奮臣無任

謝對衣金帶表

睿恩申命顯服頒榮冒寵無堪撫躬增愧

中謝

伏念臣

性資淺陋學術迂疎備官無補於涓埃竊祿分甘於冗散遽陪法從復假徽章此蓋伏遇太皇太后殿下發政惟新用人求舊特隆異數加惠邇臣拜賜知榮益勵竭忠之節捐軀圖報冀無虛受之羞

又

便蕃寵命過推三錫之恩煥爛徽章加賜九鐙之帶德非稱物慚已厚顏

中謝

伏念臣鼯鼠之技易窮駑馬之

才屢試起之散地遽分守將之權收寘近班復玷從官
之列重頒異數併示眷私此蓋伏遇皇帝陛下曲借寵
光增輝擣櫟拜而受服敢忘彼其之譏束以立朝益勵
匪躬之節

謝賜萬年縣君冠帔表

誠意冒聞睿慈下逮靡從改授曲示匪頒顧同產之遭
逢見異恩之特達中謝伏念臣早緣忠教寢服榮階尸
祿已多在公奚補雖弟兄之並仕顧姊妹之寡存偶因

可請之恩願易從中之賜敢圖聖念深軫私門遂使遺
嫠坐蒙華寵被之首服可慚主賓之卑煥若霓衣如自
璇霄之降榮逾所望感極何言此蓋伏遇太皇太后殿
下體道安民示慈愛物靡間幽微之賤兼存衣被之功
更以先臣賁其遺體寵均在笥置私室以光華徒有同
胞望公朝而感泣

又

恩在令中方瀝肺肝之請寵由意外遂霑手足之私雖

加美於一身實增光於兩族叨榮為幸報賜何階

中謝

竊以御人臣之衆而知念其私家憫公卿之勞而不忘其後世求之在昔已曰希逢而況事非出於故常澤徧加於內外實為殊遇蓋異泛恩唯是女兄蕞然嫠婦佩帨即事早悲託體之同恤緯在庭未遂飾身之請微誠仰達聰聽下臨特頒冠服之華不易衣裳之賜恩由上出榮可家藏此蓋伏遇皇帝陛下善與人同聖由天縱親奉神宗之遺澤緬思仁祖之任賢念及寡居曲為華

節庶家聲之不泯知德賞之有由唯是孤臣將何報國
拜天子之命幾顛倒於裳衣比大夫之妻更增華於車
服臣無任

賀獲果莊表

臣某言伏覩熙河經畧司奏今月十九日洮東安撫种
誼領兵至洮州擊敗果莊軍活捉到果莊者天威昭赫
師律訓齊深入妖巢生致渠首中賀竊以裔夸小醜獷
獸為心蒙被國恩不加報復侵犯邊圉數有震驚遂敢

交通種羌結為黨與解仇合意伺隙成謀賊傷屬國之人竊據乘障之地先朝所不忍貫聖算嘗此留心至于罪稔禍盈天棄神怒偏師纔出元惡就擒昔高宗鬼方至于三年漢元郅支遠在萬里而皆斬馘血刃之功率非係頸獻囚之事矧其稽積歲月勞勩師徒豈如廟畧無遺虎臣思奮曾未旬浹已報翦夸吉語亟聞戎捷交上雪邊人夙昔之憤奪諸羌前却之心追視古先莫可倫比伏惟皇帝陛下神武天縱睿謀日新任衆材而責

成因常德以立事運陶鈞而獨化其易轉圜覃上仁以
大同既思率服仰繫睿算逮此成功臣等叨預弼諧無
裨洪造奉承嘉慶徒切歡愉臣某等無任

又

天網無私本非好殺神理助順叛者自亡曾是偏師之
出疆遂聞元惡之授首諸戎震疊西鄙肅清中賀伏惟
太皇太后殿下天覆四方坤載萬物好生之德發於自
然柔遠之功覃於無外昆蟲草木咸知此心天地鬼神

陰相其業顧西蕃之遺種辜累聖之鴻私頃在熙寧之間誘陷思立之衆置而不問猶覬知恩爵秩兼隆賜予不絕而迺潛結西夏攻圍南川焚蕩傷夸動以萬計發掘驅虜不可數知築據臨洮傲睨天討當宁太息念疆場之無辜諸將激昂知背誕之不赦兵刃既接凶黨奔亡臨衝未施壁壘自破老羗奪氣白首就擒即聽檻車之行以正黨街之戮乃者托跋小醜憑恃解仇之謀猖狂大言陰蓄窺邊之計脣亡則齒知難久臂解則肩不

自持料其破膽之餘，覬塞無日信矣。得天之助，本於愛物之誠。臣等鎮撫無功，黽勉備位，仰依干羽之化，庶覩兵革之藏，欣戴之心，倍萬倫等，臣等無任。

謝賜御書表

元祐丁卯九月十六日賜

右臣等伏蒙聖慈，各賜御書一軸者，帝謨濬哲，有以知天縱之能宸翰昭回，乃獲覩雲章之盛墨妙，周於物覩聖心著於日新。臣等叨備弼諧，猥承睿睟，雨露之澤，方邱山而莫逾。子孫之藏，與鼎彝而增重。臣無任。

又

金華畢講宴需既示於深慈雲漢垂章宸藻嗣隆於厚
睠窺聖造之超詣知天縱之絕倫繇慈訓之夙成審睿
謨之日就臣等自惟近器得備邇隣荷寵賜之不貲循
懦心而載抃

進節尚書論語表

臣伏覩今月十五日以經筵講畢論語賜執政及講讀
官御筵是日內出皇帝御書唐賢律詩分賜臣等次日

於延和殿簾前占謝蒙太皇太后宣諭皇帝好學在宮中別無所為唯是留心典籍天下幸甚天下幸甚臣伏思皇帝陛下睿哲之性出於天縱而復內稟慈訓日新典學誠以堯舜三代為法則四海不勞而治今來論語終帙進講尚書二書皆聖人之格言為君之要道願陛下念茲在茲以廣聖德臣職在輔導無能裨補輒於尚書論語及孝經中節取要語共一百段進呈聖人之言本無可去取臣今唯取明白切於治道者庶便於省覽

或游意筆硯之間以備揮染亦日就月將之一助也干
冒宸嚴臣無任

穎昌府謝上表

臣某言伏奉詔命除授觀文殿大學士右正議大夫知
穎昌軍府事充京西北路安撫使已於今月九日到任
訖者袞紱再紆尤積妨賢之咎錦衣未改更叨入里之
榮復秘殿之隆名進治宮之宗秩恩私曲被感涕無從
中謝
伏念臣以一介之微生遭千年之盛際立身寡與

但遇聖明謀國何功遂諧承弼乏勤勞之濟務徒內外
以尸官一昨召自鄉邦再司政筆氣與神而俱耗老隨
病以交侵瞻視不全識慮尤短譬木心之已朽安所取
材顧鼎足之弗彊惟憂覆餗比以人言而自訟終煩聖
度之含容待其疲極而不支然後遂巡而得請仍加異
數付以舊藩兼出入之恩輝盡始終之體貌益為僥倖
有覲心顏此蓋伏遇皇帝陛下體道曲成上仁兼覆念
嘗充位幸樸櫟以無它雖或誤朝由衰遲之已甚不止

奉身而善退仍容假寵以榮歸然臣被遇三朝徧更二府壯年遇事冀有補於萬分晚歲得君竟無稱於一善尚累撫民之寄徒懷去國之慚誓以餘齡更疇洪造臣無任

謝賜詔書表

伏蒙聖慈特降詔書以臣上第三劄子乞宮觀不允所請者需章既上宜干僭黷之誅溫詔發中曲諭眷存之旨仰荷矜憐之及此不知涕泗之何從

中謝

伏念臣以

空乏之資遭休明之運進預宰司之密勿退諧鄉閭之便安寵祿滿盈慮常憂於瞰室視瞻耗眊行幾至於索途內自省循義當屏伏俾安厥位有腴于顏此蓋伏遇皇帝陛下體虞舜之聰明邁周家之忠厚隆使臣之異數廣成物之深仁肆令罪戾之餘猶竊循良之寄臣敢不虔遵聖訓祇服官箴恩愧未酬勉就承流之效疾如終廢即祈解組之歸臣無任

隨州乞致仕表

耄及已昏固難尸事目盲當廢寧復成人雖居譴謫之中敢露肺肝之請覬天威之曲霽幸物性之獲全

中謝

伏念臣材乏寸長器非遠用徒承先閥被遇累朝曩緣聖眷之隆遂竊宰司之重立朝無補蓋鮮嘉謀出位有言自干明憲沐上恩之寬貸守邊郡之優閒而臣老病交侵雙瞳並瞽初猶粗分於白黑今則全廢於視瞻簿書盈前唯吏言之是徇賓客在坐須相者而後知詎堪率屬以長人何以承流而化俗輒冒冕旒之聽妄求田

里之歸然臣名在刑書身罹罪罟省愆報國當誓捐軀
告老乞骸豈為知退若非喪明於已衰之境尚當戮力
於垂盡之年審難自盡於涓埃故敢上訴於君父伏望
皇帝陛下回日月之照廣天地之仁矜其昔玷於鈞衡
憫其已儕於矇瞍許還故土俾養殘齡摘殖冥行已迷
於歸路回智反察終悟於昨非洪化無私餘生是託

永州謝表

臣某言准告責授武安軍節度副使永州安置已於今

月十一日到永州訖辱愚誤國痛往咎之莫追聖哲當天詎明刑之可逭曲從寬典止竄遐陬泣血銜恩隕心知罪中謝伏念臣器能淺陋學術迂疎藉閥閱之餘資竊朝廷之顯仕度才量力每深負乘之憂冒寵叨榮果積山嶽之釁擢髮宜尸於兩觀分符尚玷於一麾未正嚴科難逃公議諒惜陞廉之體特寬斧鉞之誅貸其桑榆以禦魑魅身縈篤疾已傷兩目之盲舟覆長江僅救全家之溺既緣自取為幸猶多此蓋伏遇皇帝陛下日

月照臨乾坤覆載法比漢章之約仁同湯網之開矜臣
簪履之餘曲加涵育憐臣帷幄之舊尚俾生全致是阨
殘苟延視息臣敢不刻肌遷善沒齒思愆永同湖海之
民均被唐虞之化餘齡向盡唯冀於首邱洪造未醕敢
忘於結草臣無任

謝復觀文殿大學士充中太一宮使表

竄逐餘生分永捐於荒服光輝旁燭遽復齒於清班望
溢中情恩逾再造

中謝

伏念臣學非經世智不逮人荷

累聖之深知躡羣髦而驟進召從藩國入奉宸居一秉
樞衡再參揆路人微責厚恩重命輕徒知竭盡於愚誠
冀或少裨於聖治恩忘分守冒進煩言亟蹈危機屈從
輕典屏居湖外屢易歲華疾病交侵尪羸就盡陛下昭
陞寶祚特霈鴻私嘉與物以咸新視前垢而皆滌悉收
故物猥及微臣顧罪戾之同時有死生之異趨如臣疲
病猶是生還荷大施之無涯畢此生而寧報何期眷意
益服便藩寵還秘殿之名兼以殊庭之職招驚魂於百

粵薰嘉氣於長安心游魏闕之前夢入甘泉之仗然臣
雙眸俱廢寧瞻舜日之光一體偏枯永絕堯階之奉自
憐衰薄徒際盛明濫被休光唯知感涕殊常之遇既不
敢以飾辭迫切之情亦少祈於俯徇伏惟皇帝陛下天
地大德日月兼明欲從不違所私官使必量其度恢其
餘照鑒此衷誠許令養病於邱樊尚期擊壤於聖世

謝賜詔書銀合茶藥表

使華臨降有問勞之寵書天語甚溫錫扶衰之珍劑鬼

魄稍收於去幹體貌已同於近司恩眷逾涯感傷繼泣

中謝

伏念箕裘世業帷幄舊臣竊過實之虛名冒公朝之重任每欲輸誠而許國不圖違衆以誤時愛君不敢殺身省咎但知闔戶偶逢興運復振孤蹤特還秘殿之名俾使殊庭之職寵榮已極報稱謂何此蓋伏遇皇帝陛下全度包荒常善救物默運聖神之造遠追堯舜之隆知臣盛壯之時察臣朴直之節猶於衰朽欲備諮詢而臣步趨甚難豈足班於廣內視瞻已廢甘絕望於清

光敢丐殘骸歸休故里桑榆既暮難效力於明時鐘漏
有期徒懷忠於晚節臣無任

范忠宣集卷六

欽定四庫全書

范忠宣集卷七

宋 范純仁 撰

表

謝賜銀絹宣醫表

臣伏蒙聖恩特降中使賜臣銀絹五百疋兩及宣押醫官醫治者膚使倏臨挾侍醫於帝所中金加錫副縑帛於筐將寵至而受之若驚感極而繼之以泣中謝伏念臣識非致遠學昧知方志徒類於畫墁名猥同於畫餅

旋貽罪戾卒玷公朝將九死以是濱豈三已之為愠仰
銜矜貸復俾生還載去炎陬悅游赤縣使車還至恩禮
彌隆眷蔭室以生輝愧微軀之匪稱醫治問勞戴天地
之殊私衣被駢蕃佩聖神之深恤此蓋伏遇皇帝陛下
本堯仁之蕩蕩掩舜功之巍巍不徧其為急先所務詳
於禮賢而寬其轡策周於養老而簡其功程故此衰遲
猶膺眷注臣敢不勉親藥石益適寒溫冀保餘齡仰酬
洪造庶幾體大君之愛育將以刑列辟而勸忠臣無任

謝歸潁昌私第表

忱辭屢貢浥醎汗以方滋綸旨再頒奉恩俞之至渥中
謝伏念臣授材苦窳賦性顓蒙猥遇昌辰爰膺柄任肆
調商鼎思謹法以致和祗適漢規敢厭常而易作卒緣
昧陋深負東求再去巖廊迄投荒徼曷期晚節益被殊
私然臣疾病侵陵精神濩落寵還舊秩愧竊叨榮矧以
庸虛更蒙欽佇唯君子之懷道譬韞玉以待沽邈千載
之或逢豈一朝之可偶所以渭上之老養黃耆而方來

淄川之儒雖白首而猶起冥心啟沃致時熙平士所願
為人寧自廢以臣遲暮殆類昔賢如臣遭逢豈謝前輩
然嬰羸瘵莫副詳延悵時命之多屯繫風雲之難會徒
仰休明之治阻陪英俊之躔貪戀聖時唯知彊飯何臣
功之眇末重天德之溥臨盍趨召節而駕不俟行輒籲
皇穹而辭非獲已深蒙假息弛鞭策於既疲當佩隆恩
指邱園而自佚此蓋伏遇皇帝陛下恩仁博洽盛德敷
施本二帝以親賢憲三王而養老憫勞以事不程其功

命豈非常情知忝冒捐軀報國嗟朽質之無堪雅意本朝尚精誠之未泯臣無任

謝賜國醫高章章服并批語表

私旨冒開蓋恃聖君之含貸特恩如請更窺天語之溫純曲被丁寧唯深殞越

中謝

伏念臣頃緣遭遇過竊寵

靈不戒滿盈自取顛覆擠九淵而難拯視萬鬼以為隣伏遇皇帝陛下續服當天體仁澤物務為蕩滌施及厓殘拔之於既死之中還之於絕望之後官名悉復里閭

得歸因遣侍醫隨療沈瘵既更生而為德仍起廢以推
慈力盡出於公家心靡遑於私室輒殫危懇妄有哀祈
敢謂聖神重矜朽僊與收湯熨之勤效且非藩飾之常
恩併受訓詞示存眷待俾在桑榆之境更効芻蕘之忠
况臣世忝簪裳心非木石雖抱積衰之恙敢忘再造之
仁伏枕待終將何裨於君父捐軀報上當更勅於子孫
臣無任

乞致仕表

聖神撫運雖盛世之罕逢耄耄臨年顧羸骸之難強况
此沈痾之久始獲故里之還安敢叨逾更貪寵祿輒上
乞身之請願推從欲之仁中謝伏念臣材匪他長器止
近用豈識古人之大體徒慕先世之清芬遭遇聖時寅
緣膺仕力小任重既乖先覺之明福過災生遂致疾顛
之咎竄投窮徼羈愁累年敢晞社櫟之終全已分江魚
之同葬忽遇皇帝陛下資始以出庶物繼明而照四方
枯荄再榮幽蟄盡起曠然大宥全以至仁寄優任於真

宮兼寵名於秘殿復玷惟新之渥愈光殆盡之軀然念臣疾病交侵精神久憊媿君恩之過厚慮神理之害盈願掛朝紳就棲農畝伏望皇帝陛下道隆善貸德務曲成不奪志於匹夫能有容於一介閔茲誠確特賜俞從倘垂暮之桑榆俾安退跡類向陽之葵藿終亦傾心臣無任

遺表

臣聞生也有涯難逃定數死之將至願畢餘忠輒留垂

盡之期仰瀆蓋高之聽伏念臣賦性拙直稟生難危忠
義雖得之家傳利害率同於人欲未始苟作以干譽不
敢患失以營私蓋嘗先天下而憂期不負聖人之學此
先臣所以教子而微臣資以事君粵自治平擢為御史
繼逢神考進列諫垣荏苒五十二年首尾四十六任分
符擁節持橐守邊晚叨宥密之求再席鈞衡之寄遇事
輒發曾不顧身因時有為止欲及物固知盈滿之當戒
弗思禍釁之陰乘萬里風濤僅脫江魚之葬四年瘴癘

幾從山鬼之游忽遭睿聖之臨朝首圖纖介之舊物復
官易地遣使宣恩而臣目已不明無復仰瞻於舜日身
猶可勉或能親奉於堯言豈事理之能諧果神明之見
嗇未獲九重之入覲卒然四體之不隨空慚田畝之還
上負乾坤之造猶且強親藥石貪戀歲時儻粗釋於沈
迷或少紓於報効今則膏肓已迫氣息僅存泉路非遙
聖時永隔恐叩閭之靡及雖結草以何為是以假漏偷
生剖心瀝懇庶皇慈之俯鑒亮愚意以無它臣若不言

死有餘恨伏望皇帝陛下清心寡欲約已便民達孝道
於精微擴仁心於廣遠深絕朋黨之論審察邪正之歸
搜拔幽隱以盡人材屏斥奇巧以厚風俗愛惜生靈而
無輕議邊事包容狂直而無易逐言官若宣仁之誣謗
未明致保佑之憂勤不顯本權臣務快其私忽非秦陵
實謂之當然以至未究流人之往愆悉以聖恩而特敘
尚使存沒猶汙瑕疵又復未解疆場之嚴幾空帑藏之
積有城必守得地難耕凡此數端願留聖念無令後患

常軫淵衷臣所重者陛下上聖之資臣所惜者宗社無疆之業苟斯言之可采則雖死而猶生淚盡辭窮形留神逝

奏狀

辭免給事中兼侍講狀

右臣今月某日准閣門告報除授臣依前官試給事中兼侍講勲封賜如故者臣竊以門下封駁之職實惟機要出納之司苟非公忠正直之人無以振舉綱條論議

得失選任所重實難其才伏况陛下日親儒臣啟發聖
學勸講帷幄敷陳典訓必得經術行誼之士厚重端方
之臣緝熙光明陪侍左右臣久去朝廷待罪外官識智
闇淺記問涉獵加以衰遲心神耗廢學憂不講經患不
明將何以供奉禁密仰承訪逮兼是二職皆非所堪聞
命震慄靡所容措又臣與司馬光舊為姻戚臣隸左省
義亦有嫌伏乞天恩特許引避亟收誤寵遴東衆賢必
得時髦以副眷委所有告命不敢祇受伏望聖慈特賜

寢罷

謝牽復右正議大夫提舉崇福宮狀

老臣流竄餘生衰羸待盡甘斃荒徼絕望聖時伏遇皇
帝陛下特賜矜憐脫其罪罟復還爵祿許就田里既骨
而肉恩實再生然臣犬馬已疲報國無路歸骸有日結
草是期

謝復觀文殿大學士充太一宮使乞免供職狀
伏奉誥命授臣前件職任已於當日望闕祇受訖兼准

尚書省劄子奉聖旨令臣供職臣聞命皇恐感涕不已
伏念臣遭遇累朝寵祿過厚才德不稱自取顛覆昨在
湖外綿歷歲時侵冒炎蒸損耗氣血日就羸弱濱於死
所戴盆之下絕望於天豈謂恩光照臨復還爵秩許歸
鄉里在於老臣已踰分願更蒙寵增秘殿之名兼領殊
庭之職仰惟聖恩糜殞難報臣固當勉彊趨赴闕庭一
聆德音然後退就邱樊死無所恨然臣才短分薄福過
蓄生昨六月內到鄂州忽患左手足不舉至今醫治未

見痊減重念臣素來氣弱齒髮早衰加之垂老之時延
殘日甚一體偏廢兩目全瞽雖欲驅策疲蹇有所不能
伏望聖慈曲賜矜憐俯加恤察特免供職許歸鄉里以
養殘年臣若萬一尚延朝露猶與農夫田父歌詠聖化
臣無任

劄子

辭免吏部尚書第一劄子

臣昨日竊覩中書錄黃忽蒙聖恩除臣吏部尚書臣揣

分驚惶通夕不寐伏念臣資性愚短學問荒疎偶遭聖
明獲踐臺閣終緣狂瞽屢觸憲章陛下拔臣於罪戾之
餘置臣於清要之地使與名儒耆德接武聯裾人皆指
臣叨塵臣亦自知慚惕若復超越資序過被寵榮臣獨
何人而敢安處况吏部天官之職尚書文昌之貴非得
賢傑難副東求豈伊愚臣可當劇任伏望陛下憐臣寡
薄察臣懇誠特回誤恩以安拙分臣誓當糜殞仰荅恩
私取進止

第二劄子

臣以近覩中書錄黃蒙恩除臣吏部尚書即具劄子辭免尋准閣門告報令授告身臣回牒閣門居家聽命至今累日未奉俞音臣以危迫之情罔避再三之黷竊念臣少無才識老更衰疲向以多難求閒即有歸田之意先帝還其郡印陛下擢寘近班曾未踰時入陪法從既無報效固已厚顏豈意誤恩復加殊寵不唯衆譏其忝冒臣亦自畏於滿盈況無德而祿者臣下之殃為官擇

人者朝廷之美臣雖不敏此義敢忘伏望陛下曲徇物情特回天造寢臣新命俾守舊官則臣當誓竭愚忠死而後已臣無任

辭免樞密第一劄子

今月二十七日夜戌時閤門告報蒙恩除授臣中大夫同知樞密院事者聞命驚惶如墜淵谷伏念臣天資淺陋學術荒疎自忝近班未踰三月固無毫髮之效仰禱拔擢之私近除吏部尚書已是不遑寧處累黷天聽詔

不許辭方將勉勵疲駑效勤銓綜庶逃尸素之罪免為
中外所嗤豈意聖恩復加大用況唯樞近之職隣於公
相之尊預贊萬機寔司兵本宜得非常之士以副知人
之求臣伊何人敢當斯任不惟臣自取顛覆亦恐上玷
聖明臣之血誠蓋在於此方寸恐迫言不能文伏望聖
慈特賜俞允臣無任

第二劄子

今月初二日准學士院降到詔書一道以臣辭免恩命

事所請宜不允者伏念臣稟量至狹賦命數奇艷鼠之
技多窮鉛刀之銍易頓英廟擢居言路旋被左遷先朝
累玷要官曾無微效近日遭逢之盛已懷盈滿之憂若
復過被寵榮則必速貽顛覆失微臣素守之分累陛下
知人之明內負寸誠外愧清議臣之勤請蓋在於斯伏
望陛下深察愚衷亟停新命俾圖實效不采虛聲豈獨
微臣受恩誠亦有勸多士

第三劄子

今月五日伏蒙聖恩差入內供奉官勾當御藥院閤安封回臣所奏辭免劄子仍宣聖旨已行之命不許辭免者中使及門隣里驚歎奏章還賜詔旨丁寧恩寵逾涯感深涕下伏念臣本無儒者難進之節非有古人廉退之風但以素乏長材不可遽當大任必速負乘致寇之辱將招折足覆餗之憂上玷國恩下貽身咎所以披瀝肝膽罔避譴誅庶幾螻蟻之誠感動高明之聽伏望特回睿眷曲徇愚誠亟寢殊恩俾圖漸進則臣當誓竭既

衰之力仰疇從欲之私臣無任

辭免密賜劄子

臣今日晚伏蒙聖慈特降中使宣諭以臣於邊事勞心
賜臣酒果及御封合物仍不許辭免者臣才識無取齒
髮衰殘報國雖竭於疲駑臨事未免於疎闊今來果莊
就獲皆由聖德所加臣獨何功曲蒙天獎密賜御封合
物尤不敢當承命震惶殞越無地況今西夏猖獗尚聞
點兵方將動衆行師可謂主憂臣辱臣當待罪自劾豈

宜復受異恩伏望聖慈察其至誠追回所賜庶幾不至顛覆亦使愚分少安若將來西事午寧臣亦受賜未晚所有御封臣不敢開專俟回進取進止

求退劄子

臣自蒙聖恩拔居宰輔日思報效幾忘寢食然而才薄望輕任逾其量思慮差錯過咎滋深負陛下知人之明失衆人責望之意加自去秋以來衰病相仍日就羸瘠雖勤醫治終未復常蓋緣器小易盈祿厚殃至若不量

力自請必恐愈致顛覆伏望聖慈特矜危懇曲貸餘生
許解繁機假以便郡尚覬桑榆之效仰疇天地之恩臣
無任

辭免右相第一劄子

臣今日聞已降制命除授臣通議大夫守尚書右僕射
兼中書侍郎臣前日蒙延和賜對在臣榮幸已深展葵
藿就日之誠獲犬馬戀軒之願但以未知驅使去處不
敢別叙懇私豈意上誤眷懷遽爾復加圖任竊念臣虛

名過實多病早衰當兩宮臨御之初與羣賢接跡而進
旋蒙聖獎驟寘台司曾無輔翼之功竟以疲羸去位俄
膺閫寄復敗邊謀尚屈國章俾司宮鑰重以精神昏耗
方求閒僻自安忽蒙賜詔召還敢不力疾入覲目盲齒
豁形瘠體臞聖念亦必矜憐在廷之所共見豈可彊顏
冒寵據位養病將何以稱副具瞻表儀羣辟不唯取笑
中外當須別致人言伏望聖慈特回睿恩收還新命除
一便郡俾養羸軀全陛下知人之明遂微臣量力之分

第二劄子

臣昨日入劄子辭免新命未蒙俞旨今日再蒙差中使傳宣令臣四日供職竊以宰相之任繫國重輕得人則天下平康曠職則彝倫失序故大車克載者積中不敗鼎足可任者美實不傾所以人主慎於旁求臣下豈容虛受愚臣向蒙東拔亦嘗濫處此官報君無毫髮之功負責有邱山之重僅能逾歲出守外藩去國又將五年臣已倍增老態加之精神昏耗衰病支離當時已見非

才今日曷堪復用蓋負重致遠者先須量力毀瓦畫墁者安得食功在於賤藝擔夫亦須審已而受況於清朝輔弼寧當忍疾冒居伏望聖慈察臣至誠憐臣知分特回寵命別擇賢能用昭則哲之明以輔無疆之美臣無任

辭免大行太皇太后遺賜劄子

臣伏蒙聖慈特差中使梁貫之等頒及大行太皇太后遺賜伏緣太皇太后上僊臣子之情方深摧慕更復何

心忍當厚賜況今脩奉山陵賜賚兵衛溥及羣臣費用極廣臣忝居輔弼尤當體國伏望聖慈特賜追寢臣無任

第二劄子

臣昨日晚輒具劄子陳免大行太皇太后遺賜伏蒙批降聖旨不許辭免伏緣臣方自外藩入居宰席纔及兩月勞效未施難與同列諸臣均膺重賜況臣賦分寡薄貧素久諳近於忝命之初已蒙寵賚甚厚今若併有叨

竊寔恐別致咎殃臣今欲乞獨將所得回納或恐可助脩奉山陵萬分之一伏望聖慈特垂開允俾臣少安愚分不至顛殞臣無任

乞貶一小郡或間局差遣劄子

臣自秋初叨蒙召命俾復宰司尋曾量力自陳再三不敢就位實慮別致人言上玷恩獎累蒙中使宣召不許辭免逼於兩宮詔命輒冒寵榮力疾領事昨日方聞先時果有臣僚章奏糾臣咎愆臣若自知稍明必須即時

堅避度德不審竊位至今又況臣之衰殘近日愈甚臨
事昏錯往往自慚必知無補聖猷豈當尚妨賢路臣之
罪戾愈久愈深伏望聖慈推覆載之恩廓保全之賜貶
一閒局或小郡以安微臣之分以懲貪冒之非臣無任

第二劄子

臣伏蒙聖恩特遣中使賜臣詔書以臣乞貶一閒局或
小郡特賜不允并宣諭臣不須再入文字者伏念臣才
輕德薄多病早衰自叨宰執以來益為職務所困竊位

已將五月輔政訖無寸長厚祿寵名曾微補報日增月積漸致愆尤上辜陛下東求下愧士民責望又况受命之始已招彈擊之言自揣不明以至今日若更苟自容養則是靡顧廉隅將何以贊翊聖猷表率多士伏望聖慈縱知人之哲推從欲之恩察其至誠退之以禮俾居閒局幸延殘朽於桑榆儻獲一麾庶荅生成之毫髮臣無任

第三劄子

臣伏蒙聖慈以臣再上劄子乞一閒局或小郡特降中使賜臣詔書及宣諭已指揮諸處不得收接文字所乞必不允從者衰病之臣進退無取累煩天聽義不容誅尚蒙詔諭丁寧未忍遽行黜免仰戴睿眷慚懼交深然有未盡之誠難避再三之瀆竊以宰相之體當以名節自持庶可表率臣民助揚教化未聞為人彈擊而敢晏然自居況於本朝多有故事臣嘗親見仁祖以來杜衍以諫者所論即時外補文彥博為唐介面奏旋守近藩

蘇頌得守閒官猶為近例彼皆任用未久但以人言而去況臣實有疾病不比前人只緣不早自知所以今方請罪非敢輕懷去就別有邀求在臣懇切之至誠質諸神祇而無愧臣若即今罷出猶能存措紳廉恥之風若更冒昧偷安必將貽聖明圖任之悔伏望陛下曲全士節循舉舊章不容疲暗之愚臣有屈朝廷之常典察臣陳請特賜允俞誓殞微軀仰酬洪造臣無任

乞罷相劄子

臣去年六月蒙恩嚴召賜對崇政殿嘗以衰病自陳數日之間再叨宰弼尋亦累奏辭免情懇備至不獲俞音黽勉就職僅將一年迄無寸長上裨聖政而自今春以來衰病浸加形體疲羸飲食減少職事繁劇難以支持又況神識昏耗思慮顛錯事多遺忘耳目不明自慚尸素朝夕惶懼伏惟皇帝陛下天縱睿明卓然上聖宜得非常之佐以輔太平之基衰病之臣將何所用伏望聖慈特賜罷黜少逭愚臣竊位妨賢之罪臣無任

第二劄子

臣前日以衰病無補乞賜罷黜伏蒙聖恩持降中使賜
詔不允者伏念臣忝命之初已縈疾疢竊位之後寢覺
衰殘蓋由任過其能名浮於實憂勞倍切思慮愈昏至
於神識俱疲氣血耗散歷使醫工診視皆云心脈短虛
又云心為天官不可少有勞損諸臟之病莫不由之臣
亦自思其實如此緣臣職兼兩省日贊萬機心氣既虧
何以任事不敢自求生理唯恐上誤朝廷須至瀝懇自

陳必祈罷免臣方獨當宰柄不容連日養痾伏望聖慈
早賜俞允臣無任

乞宮觀劄子

臣昨以衰病乞補外郡伏蒙聖恩差知潁昌府地近事
簡深為優便而臣自到任以來私家蓄撓喪亡人口而
臣因此愁惱腹疾屢作又臣素患右眼青盲近日漸侵
左眼視物茫茫如隔重霧凡案牘詞訟文字稍小皆不
能辨若更勉強職事必恐漸至喪明若自求安養又恐

上辜寄任伏望聖慈特除臣一宮觀差遣尚俾叨竊祿食稍得將養仰覬天地之恩曲垂矜允臣無任

小貼子

臣之右目失明已久衆人所知因左目苦於獨用遂亦昏暗醫方有說謂當閉目不視久之方可望愈若蒙特允所請俾得稍遂安養則庶幾不至盲廢唯望聖慈矜憫

第二劄子

臣七月三十日伏蒙聖恩賜臣詔書一道以臣乞宮觀
差遣不允所請者愚臣殘朽輒自請於便安聖詔丁寧
迺優加於訓諭恩私曲被感懼交深尚餘迫切之誠罔
避再三之瀆竊念臣右目全瞽衆人共知此日以來左
眼復暗凡有奏報文字皆令子弟代書至於牒訴狀詞
亦須人吏傍讀顧職務之多曠在官守以何安仰恃至
仁敢求閒局覲脫簡書之畏易圖醫藥之功庶幸痊除
稍存瞻視伏蒙皇帝陛下曲全體貌猶示眷留載唯君

父之慈捐軀莫報第以藩宣之寄力疾難居儻容竊祿以養痾或免坐育而終廢必祈矜憫特賜允從

乞宮觀第三劄子

臣屢請閒官實緣衰病再頒溫詔特示矜容戴上聖之深慈在愚臣而曷稱凌兢失措跼蹐無容臣久積愆尤近蒙寬貸仍叨重寄靡易寵名方圖竭節以報恩詎敢偷安而避事但以綱條所領省視為勞恐將治之失時或盲瞽而遂廢尚貪祿食未即退休猶恃至仁曲憐舊

物儻俾琳宮之散局得為聖世之幸民誓殞微軀仰醅
洪造臣無任

乞國醫高章服色劄子

臣近蒙聖慈憫臣還自炎州久嬰疲瘵特降中使宣押
醫官高章用藥醫治臣上荷聖恩專於服餌雖手足未
遂而臟腑稍安飲食甘美已見功效臣私家亦嘗薄備
錢物延佇本人而章自言恭被聖旨不許承受臣察其
日夕究心糜費湯劑實不遑寧所有臣將來伏遇天寧

節合得冠帔恩例欲望聖慈許與本人改換章服使臣
稍報其功俾之醫治冀獲痊平然臣方起罪廢輒冒聖
聰雖深僭越蓋恃恩仁儻其肯受私家錢物臣亦不敢
更有塵瀆區區之誠覬遂矜允干犯天威臣無任



范忠宣集卷七